

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3200/0823.83

29

廣德元年

正月

丁未

庚申

辛酉

壬戌

癸亥

甲子

乙丑

廣德州志卷四十八

雜志

祥異
軼聞

兵寇
叢綴

志何以終於雜也祥異為天事而實由人與瑞不足矜
災當知所以弭也兵寇為人事而實隨乎天運因乎地
勢備禦在平時敬慎在臨事也之二者不恒有而皆不
可不知州之事多矣其應載於前者已無或漏而零篇
剩簡咸入搜羅謂之軼聞他若街談巷語幽怪傳疑宇
宙間所不必有而此邦傳說信而有徵亦不宜概削慎
取之為叢綴蓋雖一帙之書而上下數千年之事存焉

哈佛大學漢和
圖書館珍藏印



矣

祥異

五行災沴歷代皆有史志書之以為占驗蓋寓勸戒之意焉萬厯志分瑞應災異為二門瑞固寥寥災亦闕陋夫廣德之瑞孰有如孝武神龜之獻乎其災異則自宋紹興以來見於正史及通考者甚明乃於宋僅列三條而建炎德祐二條皆兵寇也與災異何涉元世水旱亦皆不載今以祥異統之使知以虎渡河為偶然者真長者之言而棄常妖興為君子所深懼

也

宋孝武帝大明三年三月戊子毛龜見宣城廣德太守張

辯以獻

宋書符瑞志

案是時廣德隸宣城故郡守以獻

案自漢迄唐史所紀災祥皆舉郡曰丹陽宣城無專

言廣德者惟劉宋此則為瑞之最著者今首列之

宋徽宗大觀元年甘露降於建平縣凡十有二日

通志據門志

在四月二日

二年廣德軍芝草生

宋史五行志

高宗紹興四年廣德水害稼

文獻通考下同

案是年安豐紹興寧國廣德筠州皆水害稼通考連書之今專書廣德從省文也後倣此自此至明初凡史傳書廣德者皆統所領二縣言之其專屬建平者直書建平洪武以後領一縣故凡專屬本州者不復言州或州與建平同者則書州屬

孝宗隆興二年七月廣德軍大水宋史五行志

乾道六年五月廣德軍大水五行志水屬又土屬云冬廣德軍饑

九年五月廣德軍水五行志續文獻通考云民艱食

淳熙二年早廣德軍為甚五行志金屬又土屬云廣德軍亦艱食

三年八月水廣德軍建平縣尤甚五行志

七年大旱廣德軍尤甚五行志金屬又土屬云廣德民大饑

案是年早饑亦見文獻通考其注云令出常平米賑之萬厯志書宋時廣德饑止此一年又云太守張廣出常平米賑之考是年守係耿秉非張廣據通考賑米出自朝命亦非守也楊門等志刪之為是

八年七月不雨至於十一月廣德軍旱五行志金屬又土屬云大饑

十年廣德軍旱本紀

光宗紹熙三年廣德軍自己亥至於六月辛丑朔雨甚五行

志木屬屬

六月辛丑建平縣水敗隄入城漂沒民廬

五行志水

四年五月廣德軍屬縣水害稼

五行志下同

寧宗嘉定八年春旱首種不入至於八月乃雨廣德旱為

甚

十一年秋不雨至於冬廣德軍旱

又文獻通考云蔬麥皆枯

十六年五月水廣德軍為甚

理宗紹定元年建平縣麥一莖四穗

門志

通志作廣德案門志作四月八

日瑞麥云云麥之生難以日紀故去之

知縣袁君儒圖上之刻石縣治

縣志

元世祖至元二十八年三月廣德路饑

元史五行志紀續通考同

帝

成宗大德元年六月廣德路饑

元史五行志

案是月書饑者止此一路

二年正月廣德水

元史帝紀續通考同

六年六月廣德路饑

元史五行志帝紀同

武宗至大元年春正月廣德路饑

元史帝紀下同

英宗至治元年夏四月廣德路旱

泰定帝泰定元年正月廣德路廣德縣饑

元史五行志下同

案帝紀書廣德路五行志并書廣德縣則知是年之

饑獨在廣德縣也

二年五月廣德饑

文宗天曆元年八月廣德路水

元史五行志 帝紀同

二年四月廣德路饑

元史帝紀下同

至順元年二月廣德路饑

明太祖洪武元年廣德旱

明史帝紀洪武元年閏七月免廣德被災田租二年詔稱廣德

去歲

遇旱

太宗永樂十八年旱

萬曆志

案此下參用楊門李縣

等志其同者不復注互異者注

憲宗成化十六年祠山廟災

萬曆志下同

孝宗宏治五年迅雷擊祠宇公署獸脊

四月奸人王實

冒稱廣德守同知察其偽執之伏罪

十三年潢水塘清是年烏集公座鶴產譙樓鵠鵠變白

州守孫紘有德政民以四者之瑞其所感云

十四年六月水溢州城

十六年五月佑聖閣災

十八年秋九月地震

武宗正德二年妖魔晝見

桃李冬花

三年大旱子粒無收草根樹皮採食殆盡

四年春饑人相食 夏大疫死者萬計遺骸載道 秋大水灌城 冬冰堅地拆禽獸草木皆死

八年蓮並蒂 白兔見

十五年譙樓鐘不叩自鳴者數日知州江暉命杖之乃止

十六年麥一莖三穗 竹一榦雙莖 枯桂重榮 潢

水重清 時謂知州江暉政理人和所致

世宗嘉靖三年疫癘大作

四年春三月隕霜殺草 秋八月蝗蟲害稼

案是年蝗蟲楊志作蠓考蠓之名宋以前未之見宋

史五行志始載太平興國元年七月泗州蠓蟲食桑

又雍熙三年四月天長軍蠓蟲食苗蓋食葉之蟲也

獨江南有之史不詳何狀此間所謂蠓小而白色傅

苗啞葉動之屑落如麥麩浮水須臾躍起傅葉如故

苗爲萎落亦有青色者殆以形似爾雅蠖蠓人因呼

蠓與其蟲與蝗迥別且此係嘉靖年事舊志所載當

得其實不知楊志何據而改之也

五年霖雨害稼

六年秋七月雨雹大如拳禾稼及鳥獸觸者皆死

七年四月建平有鸚鵡巢於樹生雛毛羽純白牧子得

之獻於官縣志

八年六月飛蝗蔽日不害稼萬曆志下同案志又云廣德有蝗自此始然四年

已書蝗矣

十二年冬十一月花紅滿樹如春

十四年夏秋不雨 九月蝗蟲大作

十五年春三月蝗蟲食麥兼害禾秧本州示民捕蝗一

石給穀二石後連日霧霾蝗遂滅不為害案是時知州朱麟

嘉靖間建平夏村生連理樹十年後生貞女夏氏人以

為連理之應云 又有楓曰鴛鴦先是成化間縣南四

十里居民王氏庄前有楓樹初生二尺許即岐而為兩

榦又二尺許復合而為一因名其地曰鴛鴦楓至嘉靖

末其家伐而為薪根抽一蘖其分合復如前云縣志

神宗萬曆二年八月建平縣東四十里山出蛟蜃洪水暴

至漂沒甚眾三日始退縣志下同

十四年十月建平溪南鎮山邊倏有一熊折樹巨枝如

拉朽人環攻之走於淖中被擊而斃

十五年春霖雨不絕建平水浸民居斗米值二錢門志下同

縣志作

十六年建平大旱

十七年譙樓災

萬曆志

建平大旱

門志

二十三年五月十七日大雨三晝夜建平水大湧溢破

圩七十餘所

縣志

二十五年祠山近斗樓災

萬曆志

建平縣西南七里赤

山色素赭至是忽青歷三四載不變

縣志

案志云赤山青山色素赭似

多青山二字故去之

二十七年二月建平鴛鴦楓

地名見前

旁生竹一本出地尺

許卽分兩榦而上高二丈餘

麥穗兩岐或有三岐者

五月山東里園中茄一帶駢生五實

縣志下同

三十六年建平大水圩堤盡沒

四十四年九月廣德蝗蝻大起禾黍竹樹俱盡

明史五行志

四十五年建平大旱飛蝗蔽天

縣志

四十七年舍東都地拆數十丈深廣五尺

李志

案李志原文有天牛耕地每一犁深廣五尺長數十

丈殊屬荒誕故去之

四十八年地震楊志

熹宗天啟三年祠山殿災楊志 冬建平地震門志

四年七月地震楊志 是年建平大水門志

五年建平大火自吳家巷至雙井延燒居民千餘家門志

下同

懷宗崇禎五年冬建平雨木冰

七年六月建平儒學前擊斃瓦雀萬餘頭案擊字上有脫字或擊字

誤

十一年建平大旱蝗

案富春陳起龍戊寅秋日陟橫山詩云欲覓招提問化機平原一望映斜暉遠空楓葉飛紅綺古刹鐘聲出翠微御輦時巡勞駐蹕豐碑雄視共瞻依公餘出郭聊停節滿日蝗蝻淚欲揮據此則是年之蝗不獨建平矣舊志失載

十二年旱蝗不為災楊志下同

十四年大旱蝗斗米千錢遺骸載道

十六年建平善政坊有士人家雞雛四足縣志

十七年州西災延燒數十間案以間計者一家之屋如晉志國子監焚房百餘間

是也數十間不言某氏屋當是數十家 除夕州前寨門即今州治頭門蓋以舊為軍故

稱寨門 無故夜崩楊志

國朝

順治二年春正月朔開印鎖固不可啟破篋出之 李生

一子大如瓜楊志 三月建平縣有文士十餘人飲酒於

市旁有犬忽作人言曰汝等都是鬼驚叱之又曰滿街

都是鬼迨五月十五日馬士英兵至殺人千餘至閏六

月二十八日復殺人數千骸骨相枕市中虛無人 四

月四日建平 文廟櫺星門無風自開縣志

十一年建平麥秀雙岐通志 案門志作四月東郊外麥一莖兩穗

十二年旱災通志

十八年建平旱縣志

康熙二年州屬大穰李志

三年建平大穰縣志下同

四年建平水

五年正月虎傷人先是千畝園地方有篠篁蒙稠亘二

十里為虎窟穴自上年秋冬屢出肆虐知州楊苞命獵

戶以火炮擊殺者數十至是報傷累累乃為文祭虎神

而盡伐叢篁焉見楊志

七年建平稔縣志下同

十年建平旱

十一年建平水

十三年建平稔

十九年正月潢水塘澄清三月餘門志案梅鎔建

平旱縣志是年有虎傷人及畜知州門可榮有牒城隍

司驅虎文門志其文云各鄉保報猛虎無數橫行原野

云涼德薄才履任乏善當即此年故附于此

二十一年四月佑聖閣災門志

二十三年建平水縣志下同

二十九年建平大雪

三十年建平稔

三十二年州屬旱李志

三十八年建平稔縣志

四十年烈日中雷電迅擊風雨驟至泮池水湧數尺有

物蜿蜒直上櫺星門盡仆李志

四十三年建平稔縣志下同

四十七年建平水

五十三年建平旱

五十五年州屬旱

李

五十六年建平稔

縣志下同

五十九年建平稔

雍正元年建平有飛蝗蔽天

原文云一隊長數十丈

自北而西所過

禾稼無損是年大穰

四年建平水

五年建平水

七年建平大稔

縣志稱成熟云云

八年建平西鄉水

九年建平稔

乾隆元年北山猛虎成羣食人甚夥白晝人不敢行知州

李國相有告城隍驅虎文

李

四年北鄉麥一莖兩穗

李

州後圃池白蓮並蒂

李

相有詩多和者合為一冊

十六年大旱荒

十七年夏旱

二十年秋蠓害稼

二十一年春大饑斗米錢四百文民食粃糠及橡子

濮陽模乙亥丙子奇荒紀事詩辛未雖大旱仰賴
 皇仁弭乙亥復奇荒禍延及丙子夏間風雨時良苗碩且
 美誰知秋風來有蟲細如蟣攢嚼禾莖中禾葉皆披靡
 豐忽變為凶千塍槁若燬比戶盡啼饑村落半逃徙春
 初抑米價米價越騰起斗米四百錢中有五升水水米
 亦難求持錢空入市市中何所有橡子及糠粃木皮百
 草根種種皆供嘴勸賑名救荒大半欲肥己東西兩粥
 厥日僅數斛米清湯不療饑得者更無幾城外叢塚高
 累累皆新鬼即此餓莩徒催課寧饒爾朝飲官裏粥暮
 受公庭捶生者鬻妻孥死者累隣里天災尚可支人害
 何能抵誰描鄭俠圖上達
 九閩裏

二十二年有狼白日入人家噬小兒甚夥江南舊無狼
 至是忽有之相傳狼畏圈多以炭或紅土畫圈牆上以

辟之

濮陽模有紀異詩

二十八年秋地震

三十七年五月梅雨大作忽夜震雷有蛟自山出溪水

暴漲漂沒廬舍多溺死者諺云五月壬子破水在山頭

過是歲五月壬子日雨果有此應

濮陽慎有溪漲行哀溺行紀其事

四十年夏旱荒 六月民間相傳小兒有災著紅兜肚

可免數日而遍 冬十二月二十五日夜大雪有雷

四十一年夏四月水

四十三年夏旱

五十年春三月夜地震有聲 自夏至秋不雨斗米錢

五百文民食草根木皮幾盡溧陽交界山有土青白色
取和麥粉藉以救饑俗呼觀音粉食者或至悶死 建
平蝗所過寸草無遺

五十一年夏五月州屬麥秀兩岐先是有蟲如蠶黑色
亦有青赤者食麥葉幾盡雨後忽不見麥大熟有一莖
兩岐者而建平至有三四岐縣令周作淵呈於上憲時
蒙城阜陽及宿州並有是瑞總督李 巡撫書

奏聞

案郡向不聞有是蟲方食葉時民皆愁歎以爲必無

麥矣走禱羣神未幾自滅稔穗秀發稔倍常年東坡
志林載雍邱令米芾有書言縣有蟲食麥葉不食實
既食其葉則實自病爲害甚於蝗有小甲蟲見輒斷
其腰而去俗謂旁不肯今此蟲頗與相類乃無待旁
不肯之驅除而麥自不爲害俗謂神力所致并目蟲
爲瑞蠶建平亦同此說然實

天休滋至

盛世嘉祥觀奏章與採山得米挖草見糧同稱上瑞而宿
郡蒙城亦有三岐之應又豈漁陽豐水僅見一隅者

所可媲美哉

是年夏五月十六日初昏有星大如月西北流其聲如

雷 秋禾大熟

廣德州志卷四十九

雜志 兵寇

兵寇

吳之知有兵也自叛楚始也鄣故邊陲首受其禍至
張角之亂此邦獨以保險助國爲漢所嘉夫丹陽山
險民多果勁吳志言之矣角起鉅鹿未涉江淮助國
之說不可得詳晉時宣城內史桓彝以郡無堅城退
據廣德以抗蘇峻宋孔覲反叛廣德令王蘊發兵拒
沈靈寵又將千人防魯江此則城郭之固甲士之雄

概可想見然此皆言其守禦之有備故孫弼周玘旋起旋滅非有疆寇之侵軼我也隋末唐初沈法興輔公祐李子通等竊據江表宣城與焉於時子通改武康為安州法興以長城為長州又置安吉皆與廣德鄰接城門之殃勢必不免而史無明文其見於史而被害最酷烈者其孫儒戚方及宋元之末乎然則險固不足恃而除戎器戒不虞正未可一日廢也

周靈王二年

魯襄公三年

春楚子重伐吳為簡之師克鳩茲至

於衡山

左傳

案趙實君吳越春秋云吳王壽夢十六年楚恭王怨

吳為巫臣伐之也乃舉兵伐吳至衡山而還考衡山

卽州西之橫山舊注誤為湖州之衡山

辨詳山川

則吳人

要擊之師當先子重而後及鄧廖矣觀趙氏云至衡山而還其非湖州益明故叙兵寇自此始

敬王四十年

魯哀公十五年

夏楚子西子期伐吳及桐汭

左傳

案桐汭之役雖亦深入吳境去衡山尚數十里然當時陳侯已使公孫貞子來弔芊尹蓋又言楚為不道

薦伐吳國虐厥民人可見楚為吳患及桐汭為已甚

矣乃可使至湖州之衡山哉

漢桓帝嘉平初有越寇命費鳳討理之

費鳳碑云丹陽有越寇命鳳討理之試守故鄣長又云鄣土不庭黔民作慝命君治之政化風行見吳興掌故

集互詳職官

晉元帝時陽羨人周勰潛結徐馥為亂孫皓族人弼亦起

兵於廣德以應之尋為宣城太守陶猷所滅

晉書周勰傳字彥和義興陽羨人元帝時中國避亂者多居顯位駕御吳人吳人怨之勰因之欲起兵潛結吳興太守徐馥使馥矯叔父從事中郎札命以合眾豪俠樂亂者附之以討王導刁協為名孫皓族人弼亦起兵於廣德以應之時札以疾歸家聞而大驚乃告亂於義興太守孔侃勰知札不同不敢發兵馥黨懼攻馥殺之

孫弼眾亦潰宣城太守陶猷滅之

明帝太寧元年宣城内史錢鳳作逆加鍾雅廣武將軍率

眾屯青戈時廣德縣人周玘為鳳起兵攻雅雅退據涇

縣收合士庶討玘斬之晉書鍾雅傳宣城縣志明帝太寧元年事

成帝咸和二年十二月辛未宣城内史桓彝及蘇峻戰於

蕪湖敗績退守廣德三年二月王師敗績彝進軍涇縣

六月力戰死之參晉書帝紀

晉書桓彝傳字茂倫譙國龍亢人明帝伐王敦拜散騎常侍引參密謀敦平以功封萬寧縣男丹陽尹補宣城內史蘇峻之亂彝糾合義眾赴之會朝廷遣將軍司馬流先據慈湖為賊所破長驅逕進彝以郡無堅城遂退

據廣德尋王師敗績爨聞慷慨流涕進屯涇縣後賊將韓晃攻爨爨固守經年勢孤力屈城陷為晃所害宣城人紀世和率義故葬之賊平追贈廷尉咸安中改贈太常

案晉書帝紀咸和三年二月王師敗績六月韓晃攻宣城內史桓彝力戰死之而傳云王師敗績爨屯涇縣韓晃攻之固守經年蓋統言其前後守城久耳則在廣德亦數月矣

唐元宗天寶中廣德盜起陷城邑至宣州涇縣初李偁由太平長遷涇令政清而簡民悅之卒葬於涇子孫家焉至是獨不忍壞其廬詔贈偁宣州刺史

南畿志

僖宗時黃巢之亂土民張姓者帥鄉兵禦之兵敗誓死不
退今誓節渡是也

楊志

昭宗大順二年正月孫儒屯溧水楊行密遣李神福屯廣德夜襲儒走之行密以神福為宣池都遊奕使儒遣馬殷擊敗行密將田頔劉威於黃池進營廣德乘勝圍宣州五月不解會大水廣德黃池諸壁皆沒儒還揚州七月朱全忠遣使約行密共攻儒儒焚揚州渡江乙未自蘇州出屯廣德行密拒之被圍行密將李簡力戰破寨拔行密出之十二月頔威與儒決戰皆大敗儒連屯稍

西通宣州

新唐書楊行密傳字化源廬州合肥人昭宗以宣州號
 寧國軍授行密節度使大順二年孫儒屯溧水循山構
 壑行密遣李神福屯廣德計曰兵倍不戰當迎其銳驕
 之乃退舍儒衆以為怯守者懈神福夜襲走之俄田頔
 劉威為儒所敗行密欲守銅官神福曰儒掃境以來利
 速戰宜堅壁老其師則我無敵矣又出輕騎絕糧道使
 前不得戰退無仰儲不亡何待於是行密以神福為宣
 池都遊奕使儒始乏食儒圍行密宣州五月不解孫
 儒傳河南河南人龍紀初昭宗授節度使大順元年行
 密取常潤儒怒三分其軍渡江復拔常潤明年儒引兵
 自京口轉戰田頔劉威等合兵三萬邀儒黃池儒遣馬
 殷擊走之儒營廣德乘勝至東溪遂圍宣州會谿潦暴
 湧廣德黃池諸壁皆沒其秋儒焚揚州引而西號五十
 萬旌旗數百里所過燒廬舍殺老弱以給軍儒屯廣德
 陶雅以騎軍破儒前鋒屯嚴公臺十二月頔威與儒決
 戰皆大敗儒連屯稍西吳任臣十國春秋吳世家大

順二年正月孫儒全舉淮蔡之兵濟江自潤州轉戰而
 南楊行密守將田頔安仁義屢敗行密遣都指揮李神
 福等拒之儒軍於黃池五月大水諸營皆沒儒還揚州
 七月朱全忠遣使與行密約共攻儒儒焚揚州廬舍驅
 丁壯婦女渡江乙未儒自蘇州出屯廣德行密引兵拒
 之儒圍其寨行密將上蔡李簡帥百餘人力戰破寨拔
 行密出之十二月儒焚蘇常引兵逼宣州號五十萬
 祠山事要孫儒過江將逼縣吳國主命將田頔領甲士
 於縣周下入寨總五千人為備禦儒亦領兵至縣北及
 縣西南隅其下三十八寨即無連營屯聚之所時值苦
 雨儒累詣廟祈晴無應雨益甚儒怒縛祝投井中尋敗
 劔

案廣德被兵孫儒為最久觀事要言下三十八寨更

無隙地其蹂躪可知矣

景福元年二月儒復圍宣州五月行密屢敗儒兵破其廣

德營張訓屯安吉斷其糧道儒食盡士卒大疫六月戊寅行密縱兵擊之大雨晦冥儒軍大敗額擒斬之傳首

京師儒衆多降行密十國春秋吳世家

孫儒傳景福元年儒復圍宣州屯陵陽行密戰不利乃分兵攻廣德壁而絕饗道軍適大疫儒病疴行密率安

仁義田頽決戰儒軍大敗額執儒獻行密就刑於市傳首闕下田頽傳儒壁廣德額破其屯密用以擒儒

五代史吳世家景福元年儒兵饑又大疫行密悉兵擊之儒敗被擒祠山事要景福中儒令沈粲領兵在縣

東二十五里下三寨田頽選帳下勇敢士五百人夜斫粲寨行二十里遇雨入廟假寐夢神言五更初進軍必

大勝果擒粲斬之

天復三年八月寧國節度使田頽反楊行密遣臺濛將兵

應之額畱將郭行悰及王檀汪建於蕪湖以禦李神福

而自將步騎與濛戰十月戊辰與濛遇於廣德濛以行

密書徧賜額將額將下馬拜受濛因其挫伏縱兵擊之

額兵遂敗奔還宣州濛引兵圍之額亟召蕪湖兵還不

得入行悰檀建及當塗廣德諸戍皆降十國春秋吳世家

田頽傳頽反攻昇州行密召臺濛泣語曰人常言頽必反我不忍負人額果負我吾思為將者非公不可濛率

騎渡江與額將檀等戰廣德以行密書遺檀諸將皆再拜氣奪濛麾兵擊之檀走頽還至蕪湖為亂兵所殺

五代史吳世家天復三年田頽叛襲昇州執李神福妻子歸於宣州行密別遣臺濛擊頽頽敗死十國春秋

臺濛傳字頂雲合肥人驍勇善戰積功至漣水制置使田頽變作行密遣濛將兵應之頽自將步騎逆戰覘者

言濛兵營寨編小裁可容二千人頽易之不復徵外兵濛與頽遇於廣德濛以頽麾下皆行密故時部曲可以計取陽出行密書徧賜頽將果下馬拜受濛乘其挫伏縱擊之頽敗走還宣州濛引兵圍之斬頽首衆潰遂克宣州江南通志十一月濛與頽遇於廣德頽大敗墜馬斬之遂克宣州

案吳世家云十月頽與濛遇於廣德通志作十一月

吳世家頽畱行棕檀建於蕪湖田頽傳則云濛擊走檀等於廣德至田頽之死或云亂兵殺之於蕪湖或云斬首於宣州或云於廣德大敗墜馬斬之未知孰是今並存之計孫儒屯廣德自大順二年至景福元年伏誅而廣德始為楊吳所有後十年為天復三年

又為田頽所據自八月至十月而滅

天祐十年

楊吳隆演六年案五代史天祐三年朱梁篡立改元開平至是又改元鳳曆楊氏仍稱唐號

為天祐十年五月吳宣州刺史花虔令廣德鎮遏使渦信屯

廣德將復攻衣錦軍吳越王子傳瓘將兵禦之六月拔

廣德縣獲虔信及吏卒七千餘人以歸十國春秋吳越世家

袁樞通鑑紀事本末五月吳遣宣州副指揮使花虔將兵令廣德鎮遏使渦信屯廣德將復寇衣錦軍吳越錢

傳瓘就攻之六月錢傳瓘拔廣德虜花虔渦信以歸

吳越世家王子湖州刺史傳瓘五月率騎兵攻廣德縣城六月巳卯城陷傳瓘手刃二十餘人獲敵將花虔渦

信及卒吏七千餘人以歸祠山事要天祐十年四月十二日諸路兵騎俱到縣民吏僅三百餘家荷戈之士五百而已日午彼兵望城上有甲士千重矢鏃如雹急

引去六月八日再至民皆入林麓避之萬曆志郭師從合肥人仕吳越為浙東馬步都虞候從文穆王元瓘破廣德
案志以郭師從入寓賢大謬今移載於此

案事要所稱諸路兵騎蓋即吳越錢氏之兵也而所

記月日與史不同考通鑑紀事本末是年三月吳使

李濤率兵自千秋嶺寇吳越衣錦軍四月濤為錢傳

瓘所擒濤之進兵自當取道廣德然係本國之兵不

應閉城拒之恐有傳訛姑並存之

宋徽宗宣和二年睦寇方臘據寧國將趨廣德抵界尋引

退

祠山事要宣和二年睦寇方臘至歙廣德距歙無數舍之遠人心皇皇及京東將夏諮失利寧國不守殘卒為賊所逐直趨廣德抵界有河瀝溪水淺可涉官軍渡已欲渡溪忽風電雨雹大寒凜眾股慄僵仆由是披靡引退

高宗建炎三年北兵至江上趙鼎請督周望分軍出廣德

宋史趙鼎傳北兵至江上上幸會稽召臺諫議去雷鼎陳戰守避三策拜御史中丞請督王瓌進軍宣州周望分軍出廣德劉光世渡江駐蘄黃為邀擊之計

十二月辛巳金人陷廣德軍殺守臣周烈岳飛破兀朮於

廣德兀朮自廣德破臨安

宋史帝紀建炎三年十二月辛巳金人陷常州守臣周杞遣赤心隊官劉晏擊走之陷廣德軍殺守臣周烈

岳飛傳金人渡江杜充遣飛等迎戰王玘先遁獨飛力戰會充已降兀朮趨杭州飛要擊至廣德境中六戰皆捷擒其將王權俘簽軍首領四十餘遣還令夜斫營縱火飛乘亂縱擊大敗之四年兀朮攻常州宜興令迎飛移屯焉餘詳宦績韓世忠傳兀朮分道渡江諸屯皆敗世忠退保江陰杜充以建康降敵兀朮自廣德破臨安至史宗弼傳宗弼自江寧取廣德軍路斜卯阿里傳阿里蒲盧軍別降廣德軍先趣杭州宗弼即兀朮也

案兀朮破臨安岳飛駐軍廣德遏其歸路自三年十一月至四年三月金人再攻常州飛始移屯而是月

戚方又陷廣德矣
四年三月己巳戚方陷廣德權通判王儔不屈與朱嗣孟李唐俊潘偁韋績蔣夔皆死六月甲申岳飛破降之

宋史帝紀建炎三年十二月丁丑江淮宣撫司準備將戚方擁衆叛犯鎮江府殺守臣胡唐老四年三月己巳戚方陷廣德殺權通判王儔四月乙酉戚方圍宣州六月丁丑戚方犯湖州安吉縣甲申岳飛破戚方於廣德軍岳飛傳詔討戚方飛以三千人營於苦嶺方遁俄益兵來飛自領兵千人戰數十合皆捷會張俊兵至遂降王儔朱嗣孟等已詳宦績忠烈各傳

案自三月至六月廣德為戚方所據西圍宣州南犯安吉岳飛既搗其巢穴而張俊復至故不得已而降也

紹興元年土寇高彥張琪前後入境尋敗走祠山事要

二年五月丙子呂頤浩總師至常州前軍將趙延壽兵叛

於呂城鎮丁丑延壽犯金壇縣殺知縣胡思忠頤浩稱疾不進乙酉劉光世遣王德追趙延壽叛兵至建平縣

悉誅之宋史帝紀

瀛國公德祐元年三月癸酉元兵入建康府命兩浙轉運司准備差遣羅林浙西安撫司參議官張濡戍獨松關山陰縣丞徐垓正將郁天與戍四安鎮起趙淮為大府丞戍銀樹東壩甲申元兵至西海州丙戌知廣德軍令狐槩以城降保康軍承宣使總都督府諸軍張世傑遣其將閻順李存進軍廣德辛卯閻順戰安吉縣復取鳳

平張濡部曲殺元行人嚴忠範於獨松關執廉希賢至臨安重劊死丙申顧順攻廣德軍復取之四月乙巳元兵入廣德縣知縣王汝翼與寓居官趙時晦率義兵戰斗山路分孟唐老與其二子皆死汝翼被執至建康死之冬十月壬戌元兵發建康參政阿刺罕四萬戶總管奧魯赤將右軍出四安鎮趨獨松關十一月戊寅元兵破廣德軍已卯破四安鎮正將胡明等死之丁亥獨松

關告急己丑獨松關破馮驥死之張濡遁宋史帝紀

宋史張世傑傳遣將四出取浙西諸郡復平江安吉廣德溧陽諸城兵勢頗振為制置副使兼知江陰軍已而

〔大元軍至獨松關〕〔元史帝紀〕至元十二年三月丙戌國信使廉希賢嚴忠範等至宋廣德軍獨松關為宋人所殺十一月乙亥伯顏分軍為三趨臨安阿剌罕率步騎自建康四安廣德以出獨松嶺乙酉阿剌罕克廣德趨獨松關十三年三月丁卯以獨松關守將張濡嘗殺奉使廉希賢斬之籍其家〔廉希賢傳〕至正十二年春授希賢禮部尚書佩金虎符與工部侍郎嚴忠範持國書使宋三月丙戌至廣德軍獨松關守關者不知為使襲而殺之張濡以為已功受賞知廣德軍明年宋亡獲張濡殺之〔伯顏傳〕三月丙子希賢與嚴忠範等奉命使宋請兵自衛伯顏曰行人以言不以兵兵多徒為累使事希賢固請與之丙戌至獨松嶺果為宋人所殺〔阿剌罕傳〕伯顏分軍為三道阿剌罕由西道趨溧水溧陽攻破銀樹東壩至護牙山慶豐圩敗宋軍斬首七千級又擒其將祝亮并裨校七十二人斬首三千級又與宋兵戰斬首七千級逐其援兵退走數十里又敗其都統等三人斬首三千級破建平縣殺其守吏進攻廣德軍獨松關軍次安吉州上栢鎮濡率兵來拒戰大敗之

斬首二千級生擒其副將馮翼戮於軍前濡遁走追斬之〔輿魯赤傳〕分兵出獨松關宋兵堅守輿魯赤令將校益兵樹旗幟於山上率精騎突之守兵驚潰棄關走追逐百餘里斬馘不可勝計〔高興傳〕宋張濡殺使者嚴忠範等於獨松關伯顏使典討之師次溧陽再戰斬其將三人士卒三人虜四十二人遂破溧陽斬首七千級授金符為管軍總管從戰銀墅斬宋將三人士卒二千入拔建平斬其總制二人虜知縣事黃君濯由間道奪獨松關進至武康擒張濡〔元文類〕元明善高公神道碑再戰斬吳杜李三總管陷建平獲知縣黃公濯破獨松關斬谷總制又于盤降封宋主為瀛國公制戈船飛渡而天塹無憑鐵馬長驅而松關失險

案宋都臨安北兵之來獨松關為陸路要害故一聞

警即遣張濡戍之殺元國信使廉希賢等於此而廣

德又為獨松關咽喉元史屢稱廣德軍獨松關是也

伯顏計趣獨松豈直為希賢報復哉當顧順攻復廣德時元世祖以時暑方熾不利行師俟秋再舉伯顏奏稱宋人保險少縱則逝故驟引兵再入廣德自三月至十一月兵無虛日而建平毗連溧水溧陽等處實廣德之北門故阿剌罕高興拔建平進攻廣德勢如破竹而臨安以危迨宋亡後獨松關見諸元人制册賀表與長江天塹並稱其為要害斷可識已

是年元懷遠大將軍楚鼎領兵鎮寧國平建平南湖廣德諸盜察罕亦出廣德遊擊軍敗宋兵進攻獨松關

元史楚鼎傳至元十二年師渡江鼎從知太平州孟之縉降行省遣鼎諭寧國府守將孫世賢下之制加鼎懷遠大將軍領兵云云昭八罕兒傳萬戶府副鎮撫從脫脫總管出廣德遊擊軍與宋兵戰敗之又從攻獨松關

元順帝至正十一年盜起汝穎已而蔓延於江東之徽宣

廣德所在不守慶童以次克復時董搏霄亦有恢復功

元史慶童傳至正十年遷平章行省江浙明年盜起汝穎已而蔓延於江浙江東之徽宣廣德所在不守慶童分遣僚佐往督師旅會不踰時以次克復既乃令長吏按視民數凡註誤者悉置不問招徠流離俾安故業發官粟以賑之邵遠平續宏簡錄徐壽輝傳項普畧拔饒州潛由徽州達信州入昱嶺關攻杭州江浙平章教化移軍來援用總管董搏霄計遂復杭州已而餘杭德清武康安吉廣德徽州搏霄皆次第恢復

至正十二年賊陷徽州廣德蔓延至上元江寧也先帖木

兒兵復上元江寧乘勝入溧陽溧水賊潰奔廣德三旦
八佛家閭引兵來會賊悉平十二月辛亥詔以杭常湖
信廣德諸路皆克復赦註誤者蠲其夏稅秋糧命有司

撫恤其民詔見元史帝紀

元史納麟傳至正十二年命為南臺御史大夫兼太尉
總制江浙江西湖廣三省兵馬賊陷徽州廣德蔓延上
元江寧是時湖廣行省平章政事也先帖木兒軍和州
納麟遣使求援也先帖木兒兵東趨秣陵殺賊二千餘
人盡復上元江寧境乘勝入溧陽溧水賊潰奔廣德時
江浙行省平章政事三旦入右丞佛家閭亦引兵來會
賊悉平

案南畿志元末為金人所據韓彥邦復之眾立達達

萬戶之子守其地楊志至正十二年金兵據廣德元
將韓彥邦克復之至十五年眾立元達為萬戶守路
考是時無金人入寇楊志於州言金兵於建平又云
金元帥當是金姓賊自號元帥耳

至正末揚州民共起義兵攻殺苗人餘黨奔潰宿留廣德
吳興間

陶宗儀輟耕錄元至正末阿魯灰總兵駐淮西招納苗
人楊完者入中國不可控制殺掠至揚州民共起義兵
攻殺之餘黨奔潰度楊子宿留廣德吳興間續宏簡
錄楊完者統苗軍禦張上誠既入內地恣肆不復可制

案輟耕錄云至正末不指何年考元史福壽傳至正

十五年阿魯灰以苗軍鎮揚州而阿魯灰御軍無紀律苗軍殺阿魯灰以叛於是民願為兵自守與此云其起義兵合知其事在十五年即楊志所載眾立元達時也據達識帖睦爾傳至正十六年苗軍帥楊完者時駐嘉興明年始見殺傳又云苗軍素無紀律肆為鈔掠所過蕩然無遺然則宿留廣德時其害可勝言哉

明太祖丙申年

元至正十六年

夏六月乙丑鄧愈克廣德先是乙

未冬徐達等破禽元將陳埜先別將兵取溧陽溧水

明史

徐達傳

趙德勝蔡遷平寧國取廣德其克寧國也禽元義

兵元帥朱亮祖居數月叛歸據宣城太祖方取建康未

暇討也

朱亮祖傳

元長鎗帥謝國璽等復據廣德至是鄧愈

從下集慶進廣興翼元帥出守廣德州與華高擊破國

璽同時趙德勝華雲龍吳禎丁德興皆有戰功焉

明史太祖紀丙申年六月乙丑鄧愈克廣德元史本紀係

至正十六年六月乙丑明史趙德勝傳下集慶功最

從徐達取鎮江破苗軍水寨下丹陽金壇平寧國轉領

軍先鋒取廣德破張士誠水寨復從常遇春攻常州解

牛塘圍復廣德寧國蔡遷傳從徐達取廣德遷萬戶

案輟耕錄至正十六年張士誠據平江時長興武康與廣德相界為花鎗軍出沒之地雖互有勝負然亦不勝其苦未知花鎗軍即長鎗帥否若然則是長鎗帥乘寧國復叛遂據廣德又與士誠爭此州之受其蹂躪者多矣

丁酉年元至正十七年春二月丙子朔太祖遣耿炳文劉成自廣

德取長興九月丙戌廣興翼元帥費子賢率兵取武康

明太祖實錄平吳錄

戊戌年元至正十八年費愚兵自廣德克安吉

明太祖實錄及平吳錄至正十八年元帥費子愚總管張德下安吉築城守之孝豐縣志元至正末安吉縣為張士誠所據明初元帥費愚兵自廣德路入克之即命愚守其地

案費子賢耿炳文與張士誠相持自丁酉年二月至

丙午年十月始下湖州則十年中雖無兵革之患亦

多征調之苦矣

武宗正德十二年安吉民湯毛九作亂知州周時望判官

况照率鄉兵集苦嶺以備禦之萬曆志

世宗嘉靖九年三月建平妖人虞順惑眾數月就擒萬曆志

國朝

順治二年五月馬士英以黔兵四百人走浙江經廣德攻

破之殺知州趙景和大掠而去

明史馬士英傳

三藩紀事本末順治二年五月

王師渡江圍江寧王

奔蕪湖馬士英以黔兵與阮大鍼奉太妃走浙江兵至廣德州知州趙景和言彼不奉王而奉太后詐也閉門拒守士英攻破之殺景和趨紹興

閏六月二十八日建平縣土兵作亂聚眾環城杜令自

度不免以一孫托吏程應桂匿而活之七月朔令被戕

於倉巷城市屍相枕藉旬日乃定

縣志

是年瑞昌兵逼城下時郡無備禦知州閔以棟率眾櫻堞

固守援至而解

張玉書記平定江南事云三年瑞昌王潞安王率兵三萬攻江寧見文貞公集

閔以棟續萬厯志跋州始殘於馬孽繼燬於土妖郊原

城郭間白骨如莽行旅絕跡余單騎之任席未暖瑞昌之兵已逼城下時應敵無械守備鮮徒集遺民櫻堞環視已潰復完不合睫者閱月賴援戎而解

十六年有海寇突至陷建平城劫倉庫卽颺去

縣志

